

Vijećnička pitanja

Izudin Pušćul: je postavio dva vijećnička pitanja. Prvo pitanje je ko je i kada dao saglasnost za održavanje press konferencije političkog subjekta „Naša stranka“ Kakanj u prostorijama JU „Gradska biblioteka“ Kakanj, te da li će u narednom periodu postati praksa da politički subjekti svoje press konferencije održavaju u JU „Gradska biblioteka“? Napomenuo je da je identično pitanje postavio na 29. sjednici Općinskog vijeća i da na isto još nije dobio odgovor. Drugo pitanje je zašto u prijedlogu odluke o odobravanju sredstava za kapitalne projekte, koja je usvojena od strane Vlade ZDK, a čiji je predlagač Ministarstvo za prostorno uređenje, promet i komunikacije i zaštitu okoline, nema planiranih sredstava za Općinu Kakanj? Ocijenio je poražavajućim da u donesenoj Odluci Vlade ZDK za Općinu Kakanj nisu planirana finansijska sredstva za kapitalne projekte iz oblasti cestovne infrastrukture ZDK za 2023. godinu. Još je rekao da se nikad ranije nije desilo da prilikom raspodjele sredstava ZDK, Općina Kakanj bude izostavljena.

Slaven Katičić: je postavio dva vijećnička pitanja. Prvo je šta je do sada poduzeto i šta se planira poduzeti da se okonča problem u MZ Vukanovići vezano za uništavanje lokalnog puta usljed voženja velikih tereta preko 7,5 tona nosivosti i kršenja Zakona o prometu na cestama i kategorizaciji cesta u ZDK, a koji problem traje već duži vremenski period? Drugo pitanje je u kojoj se fazi nalaze projekti rasvjete iz 2021. i 2022. godine, te kada se može očekivati realizacija projekata rasvjete Haljinići-Čalukova Bara, Gornji Banjevac, Vukanovići i drugi projekti?

Nerma Aliefendić: je postavila vijećničko pitanje kojim traži dostavu informacija o terminu, metodologiji, kriterijima i načinu raspodjele sredstava po Programu utroška sredstava za podjelu paketa podrške energetske siromašnim domaćinstvima, a koji je pomoć Evropske unije stanovništvu Bosne i Hercegovine.

Vinka Aletović: je postavila vijećničko pitanje zašto se nije postupilo u skladu sa članom 72. Statuta Općine Kakanj i potvrdilo mandate izabranim članovima Savjeta MZ Željeznička stanica, s obzirom na to da su se izbori za članove Savjeta MZ odvijali u skladu sa propisanim pravilima i zašto se nije ispoštovala izborna volja mještana naselja Željeznička stanica? Ovo posebno ako se ima u vidu da je Vijeće usvojilo Izveštaj Komisije za provođenje izbora u kojem je navedeno da su se izbori odvijali u skladu sa propisanim procedurama i da se Općinskom vijeću predlaže da potvrdi izborne rezultate za članove Savjeta MZ Željeznička stanica.

Predsjedavajući je konstatovao da su vijećnici: Adnan Čobo, Branko Češljčić, Mugdin Gorak i Amar Selimović postavili vijećničko pitanje bez korištenja govornice.

Adnan Čobo: je postavio dva vijećnička pitanja da li je moguće uspostaviti određeni sistem boravka djece u JU za predškolski odgoj i obrazovanje „Mladost“ Kakanj za djecu koja krenu u školu, tokom prve godine školovanja, na način da roditelji nastave primjenjivati režim dolaska i odlaska djece kao što i jeste, a da Javna ustanova organizira odlazak i dolazak djece iz škole, te da se za isto utvrdi i odgovarajuća cijena koštanja?

Branko Češljčić: je postavio dva vijećnička pitanja. Prvo je na čiji zahtjev i po čijem nalogu je kamion JP „Vodokom“ Kakanj bio u mesnoj industriji „Semić“ u Visokom, šta je natovario, gdje je istovario i po kojoj proceduri i standardu? Drugo pitanje je jesu li novčana sredstva planirana za doček Nove 2023. godine stigla do penzionera, te ako nisu, kad i kako se to planira uraditi?

Mugdin Gorak: je postavio vijećničko pitanje ko i na koji način vrši kontrolu stanja parkova za djecu? Pitanje je postavio imajući u vodu da u Parku prijateljstva postoje oštećenja na dva tobogana, a uz to su limene konstrukcije van utora drvene konstrukcije, što može izazvati povrede djece.

Amar Selimović: je postavio vijećničko pitanje da li je Policijska stanica Kakanj u 2023. godini zaprimili prijave o napadu pasa na ljude, te da li su u 2023. godini vršili provjere nošenja obaveznih „brnjica“ za pse i koji su rezultati tih provjera (kazne)?

Vijećničke inicijative

Armin Bašić: je pokrenuo vijećničku inicijativu za orezivanje i održavanje rastinja uz gradske saobraćajnice kako je predviđeno Saobraćajnim projektom, a u svrhu bezbjednosti svih učesnika u saobraćaju, s posebnim osvrtom na raskrsnice i pješačke prelaze u užoj gradskoj jezgri.

Vinka Aletović: je pokrenula vijećničku inicijativu da se razmotri mogućnost odobravanja finansijske pomoći maloljetnoj djeci koja su ostala bez jednog ili oba roditelja. Inicijativu je pokrenula zbog sve većeg broja umrlih mladih osoba iza kojih su ostala maloljetna djeca, pa predlaže se da se u budžetu Općine Kakanj planiraju sredstva za finansijsku podršku djeci bez jednog roditelja u mjesečnom iznosu od 200,00 KM do punoljetstva, a za djecu koja su ostala bez oba roditelja u mjesečnom iznosu od 400,00 KM za svako dijete.

Edin Šljivo: je pokrenuo dvije vijećničke inicijative. Prva inicijativa je za rješavanje imovinsko – pravnih odnosa Općine Kakanj i JP „Željeznice“ FBiH. Inicijativu je pokrenuo zbog negodovanja lokalnog stanovništva (Povezice, Modrinje, Rošćevina i dr.) koji zbog nekih spornih pristupnih puteva između Općine Kakanj i JP „Željeznice“ FBiH, kao i samih građana, imaju problem dobijanja urbanističke saglasnosti, obzirom da su JP „Željeznice“ FBiH vlasnici i nosioci drugih stvarnih prava na nekretninama koje neposredno graniče sa nekretninama za koju se izdaje urbanistička saglasnost. Druga inicijativa je da se dio puta od kapije Gradskog groblja pa do prvih kuća u naselju Plandište rekonstruiše i asfaltira u dužini od oko 450 metara. Razlog za inicijativu je što je pomenuti dio puta u veoma lošem stanju (asfalt ispucao, rupe i bankine produbljene od oborinskih voda). Uz to je napomenuo da na Gradsko groblje dolaze i stanovnici drugih gradova, te predmetna dionica puta ostavlja ružnu sliku Kaknja za iste.

Mediha Mamela: je pokrenula vijećničku inicijativu kojom traži da se razmotri mogućnost odobravanja i dodjele dodatnih finansijskih sredstava za rad logopeda, kroz angažman putem Fondacije Muharem Berbić. Napomenula je da su dosadašnji tretmani logopedskih usluga vršeni veoma profesionalno, te je postignut napredak u razvoju govora kod 12 djece. Navela je da je trenutno prijavljeno dodatnih 32 djece različitih uzrasta i poteškoća koji traže usluge logopeda, a trenutno angažovani logoped ne može fizički da pruži usluge djeci koja su prijavljena i koja se nalaze na „listi čekanja“, zbog čega je neophodan angažman dodatnog logopeda što iziskuje i dodatne troškove.

Predsjedavajući je konstatovao da su vijećnici: Adnan Čobo, Branko Češljčić, Namir Talić i Mugdin Gorak podnijeli vijećničke inicijative bez korištenja govornice.

Adnan Čobo: je pokrenuo dvije vijećničke inicijative. Prva inicijativa da se dio državnog zemljišta uz rijeku Zgošću i to od bazena „Benat“ pa do „Mosta šehida“, a po potrebi i dijelovi zemljišta koji se nalaze u privatnom vlasništvu na toj dionici, proglasi „Parkom“, te da se na odgovarajući način uredi i prilagodi teren u funkciji istog. Druga inicijativa je da se pokrenu aktivnosti na uređenju korita rijeke Zgošće i uređenja, odnosno izgradnje saobraćajnice uz rijeku na dionici „Crna rijeka“ do mosta na početku naselja Zgošća. Razlozi za inicijativu su neuslovnost trenutnog saobraćajnog rješenja, te komoditet koji ostaje neiskorišten dolinom rijeke Zgošće i dr. Uz to smatra da je navedeno jedno od strateških rješenja za općinu Kakanj.

Branko Češljčić: je pokrenuo dvije vijećničke inicijative. Prva je inicijativa da se poprave rasvjetna tijela u MZ Haljinići u dijelu kojeg mjesno stanovništvo zove „Naselje“, jer već mjesecima nema osvijetljenih ulica u pomenutom mjestu. Druga je da se popravi i osigura ograda na mostu Haljinići – Seoce zbog trenutnog oštećenja i nesigurnosti kojoj su izloženi svi koji koriste isti.

Namir Talić: je pokrenuo vijećničku inicijativu da se izvrši orezivanje i uklanjanje šiblja i granja, te izrasle trave na putu Kamenolom – Brnj radi lakšeg i bezbjednijeg saobraćaja na toj dionici puta.

Mugdin Gorak: je pokrenuo vijećničku inicijativu da se izvrši sanacija oštećenja na dječijem igralištu „Park prijateljstva“, a odnosi se na tobogane kod kojih je limena konstrukcija van drvenog utora što ugrožava sigurnost djece. Osim toga potrebno je postaviti nedostajuće rukohvate koji služe za penjanje djece, kao i odgovarajuće pregrade na maloj dječijoj ljulji, te je neophodno postaviti protukliznu podlogu na dijelu igrališta za malu djecu, jer je trenutno postavljena klizava drvena podloga.